

張文定公紆玉樓集

張文定公紆王樓集卷之九

序 二十六首

壽曾叔祖木菴公七十

天之佑善人也必矣以吾所聞於經傳百家數千年之
跡而徵今之天下無惑也以所見於今天下者而徵之
一鄉一族又無惑也夫仁者儉已以裕人而不仁者侵
人以自殖然天道好還施諸人者庸有不反諸其身乎
吾宗曾叔祖木菴公敦善履素絕忤求於親交衣取禦
寒室取容膝田取克食凡夫身之所奉無長物焉是故
欲易足而人無怨鄉隣之闔閭不能加時俗之紛華不

能染膏爲里宰以徵歛平恕得里人之心今以分若齒
長干張氏又以禮讓忠信得宗人心焉則其壽躋七旬
體康而心泰芒鞋竹杖逍遙乎槎湖之濱撫青松而聽
鶴唳超然無一塵之累孺人王氏以勤約理其家而爲
子若孫以耕讀世其業昌大之勢駸駸乎有不可量者
非所謂祐善之徵邪夫惟善人得壽則德與年而俱崇
譬之樹藝培植溉防護日以益深而敷榮蕃碩亦日以益
盛若公者非吾宗裕茂之攸係乎且吾張氏以積德尚
賢稱望族于明山久矣近者三十年間而擢科取仕紛
綸繼起德業文章名朝著而傳遐方豈一日之致哉而

公又克敬承之宜乎宗人之樂其壽也於是九月十有六日公初度乃相率繪圖以獻蓋喬松白鶴以朴素清遠享其修齡固公所與居處遊適而因以寓夫祝頌之情焉夫愛之欲其生孔子雖以爲惑而祝壽之詩不見廢於三百篇之中蓋修短之數雖素定於天而益謙福善固其理之恒也且好人莫先於親親况有關於宗祚者乎哉則願其恒長吾宗而衍慶於無窮非人心天命之同歟是不可無書也

宗叔祖葵軒公雙壽序

身榮而兼山林之趣志行而無治理之勞此天下之至

福而人生所同欲也是故慶莫隆乎裕後德莫難乎動
天天之所佑後必昌焉後昌則夫人情所欲咸從之矣
吾宗叔祖葵軒公以吾叔儀制郎中由精膳秩滿封南
京禮部主事叔祖母孫氏封安人公今壽六十而安人
五十有九容色筋力不殊少壯身不出乎林泉而

恩霑乎魏闕念不關乎職守而道顯乎當時蓋未始有
求於天而天之報德信有所謂如璋如圭如取如携者
公毅直而慈仁迪知踐言絲髮無所苟與人交常自損
以益人傭販之徒遇纖畜者必舉公爲訓嘗行市得遺
金徧求其人還之僅以金易絢鬻者誤多委其一命止

舟以待薄暮果來拜祝而去爲里宰庇其隸戶如子弟
焉有不給者爲之代輸官稅一家至貧代輸者屢矣弗
能償一日拾金於路踵門而言曰此天實遺我以報公
也公憫其志仍以其半歸之公田不滿十畝稱貸恒不
自給而所爲若此人謂至難祭期將至無以爲羞縉絲
而出應手得巨鱗以歸人以爲孝感云族黨無少長未
始有訟於官者聚族子姓而教肄之餘三十年勞而不
倦鄉閭雖狡且暴者於公未嘗不心服也安人儷德於
公凡所欲爲皆求而成之孝友諧於上而義方飭於下
故吾叔以英明特達之資早登甲第文章政事炳朗儒

紳中所以大公之施樂公之志而益其顯榮者當日隆而未已也而公之孫邦仁又且穎秀不同於羣兒矣公於吾父平生莫逆邦奇自幼聞公之誨惟以天理不可違天命不可不畏與吾父之言若合符節廼今食報於天者果如此公之言於是益驗十有一月朔日九月廿有五日實維公與孺人誕生之辰吾叔以係官留都弗獲躬致壽觥命邦奇叙其情而將之邦奇竊自念讀書數千卷無非明天人感應之理然不若於公與安人之獲福尤爲親切宣揚而頌祝之固足以歆艷吾宗而勗勵爲善之心焉豈特父子之愛云爾乎詩曰瑟彼玉璫

黃流在中愷弟君子福祿攸降凡在宗戚爲予誦之

壽宗叔祖逸菴公七十序

或聞榮蔡期之歌也問曰子何樂而歌諸曰吾樂甚多
天生萬物人爲貴吾得爲人一樂也人以男爲貴而吾
得爲男二樂也人生不免襁褓而吾老壽且康三樂也
夫榮公所樂固人生之所恒得曾是爲多况如吾逸菴
公者哉公當

國家熙洽隆平之時生長於旃幪之室無拮据締造之
勤而晏焉以老其下畚鍤不親畎畝不履坐獲屢豐之
年渴而飲飢而食酒漿羅於前果脩登於度幅巾深衣

起居惟適孰與榮公帶索而行者邪有克家之子三日
侍其側以給其所需宗鄰之間文儒輩出科第蟬聯左
右後先環衛而交映孰與榮公子立而無依者邪蓋自
吾先原一府君淳龐恬巽履善積德及公凡九葉餘二
百禩于茲植深發茂豈一朝一夕之故也且壽屆老傳而
誕及重九之日又昔所爲登高燕賞之辰鄉閭俗姓薦
菊稱觴濟濟淥淥於庭著之間者極一時衣冠之盛不
知榮公之生亦能值是佳期而有是慶燕之事否彼其
乳寒落寞曾淒焉不能以爲家况得而有燕會歡酣之
舉哉其不能如公又可知矣雖然先儒有言心泰則無

不足若榮公雖不足乎外獨非足乎內者邪內苟足其
於外也何有宜其達觀六合而浩然有餘當時莫窺其
際而後世猶仰其風非常人所得而及也逸菴公直而
不圓木強而無所容僞兼是衆樂尚可無自足也乎思
祖先貽燕之久與人生備福之難使心泰而身安神寧
而氣定於以協族宜家日享夫優游之福將彭祖李聃
之年不足以爲多寧若榮公九十而止哉酒酣予以是
說誦之座隅諸宗戚皆曰善哉祝也命叙而書之

叔父野雲先生六十壽序

凡有以自娛不待乎外而足其所賦者厚也人之經營

日夕汲汲而不少止其所爲者口體而已矣若夫山之
高也水之深也日月星辰之明也雷霆風雲之變也草
木鳥獸之蕃且秀也彼皆截然不與諸躬焉而智者則
極天下萬物皆籠而有之耳得之而爲聲目遇之而成
色無往而不有以自娛形之言論發之聲詩又足以寫
其涵蘊以陶其情茲其所賦不亦厚於人乎哉若吾叔
父野雲先生聰警而善悟於凡人品高下物性巧拙情
景向背往往精察而無遺風辰月夕清潭茂竹他人視
爲等閑而先生躍然若有所得是以話言不經意而新
詩詞不構思而美於以自娛寧復有待於外也續學弗

售則浩然肥遁無終南捷徑之譏不苟求取而田廬自足無黔婁困瘁之狀酣飲不亂非阮藉之狂昏嫁不累有尚長之逸吾叔母華孺人以勤儉巽順贊於中吾弟邦傑以文雅恬遜承於下盖人所不及知之趣旣獨得之而其所共願之資又備享焉其爲厚賦於天何如也邦竒自幼見吾父叔每相與聚處一堂笑語終日盖超然塵俗之外迄今白首情好無間吾父居閑無事非吾叔父在前弗樂也嘉靖甲申叔父壽六十二月七日實維懸弧之辰邦竒幼承誨育報稱未能今茲繫官西蜀弗及與諸弟奉壽觥於堂下夫以叔父賦受之完遐筭

宜未可量固知稱壽有日而今日之瞻思有不能自抑者謹以不腆之文豫致數千里之外以寄吾思而爲宗姻先焉叔父誦斯言也宜欣然受觥

、叔父東軒公六十壽序

於越之地多江山東至于勾章廓焉平壤百餘里其山三面環拱而皆極于海山海之會靈粹所鍾澄瑩而明秀甬水樾源分布聯絡而會萃于槎湖湖之上有堂若樓翬翼然中平壤而立者吾大父東臯先生之所構也而叔父東軒公承之兀於大父所構得四之三無締造之艱而坐撫四明之佳勝登樓而眺爽豁心目樓之前有

興有池可盥可樓池之畔有園有田可蔬可稼有子四
人曰邦翊邦竝邦靖邦端有婿二人曰吳金曰任用皆
秀雅而文致用有待焉而諸孫之甫免于懷亦且玉茁
森映兒者色喜公及吾叔母徐孺人並躋高年而鬢髮
渥頰起履輕健親朋時至則與吾父太史公酣歌昕夕
或鼓枻空明或試屨崇翠超然塵務之外怡怡然樂也
故鄉之人視公爲厚福予少而見公事吾大母夙夜弗
懈得其歡翼吾叔父岫雲公渙其躬不顧岫雲公得成
進士著蹟于民社蓋賴公之力居多焉故鄉之人謂公
爲厚德德以基福福以徵德山川之氣其會而鍾于公

者非一朝夕之積也吾張氏自宋季以來十有餘葉二百有餘禩而德善相仍徽嘉相續如珠貫璧聯而莫之有間也累之既深而發之未艾亦猶夫百川羣流會于槎湖來也無源去也無流若莫得而窮焉邦奇不肖承公誨育有年矣年十八領鄉薦公喜不自勝憐予少且弱也携之道路不遠數百里自今思之忽忽若昨日事而辛苦仕途髮亦且種種矣廼庚寅之歲二月七日屆公六旬初度竊想父叔交歡宗婣胥慶儼爾籩豆之間羣季方稱壽觴下上交錯而奇也係官留都弗獲與列敢序德福之厚而繼之以詩春水滿澤千林欣暢諸第

其爲我咏之綺筵以少展吾私其辭曰

湖水洋洋兮百流萃之碩人之躬兮百福會之桂馥
于庭兮玉潤于館翼翼東軒兮日華以皖

賀叔父東軒公七旬生旦序

昔在庚寅之歲叔父東軒公壽六十時某掌胃監于畱
都以弗克躬奉壽觥嘗爲文致祝明年壽且躋七十矣
而某復縻職京師念自承

召命奉母氏北上睽違叔父越七載于茲而吾母之壽
且八旬有八矣每欲假便奉母東歸兼壽我叔父情至
則拜疏陳乞而

溫言諭留久未克遂今茲歲事將新叔父初度近在數
浹旬之內稱觴拜祝又不得與諸弟相周旋瞻望遙天
心神飛越乃南嚮再拜序以祝曰吾少則見吾父叔暇
日相聚處一堂之上於天人之相與也福德之相因也
終日不離口今我東軒公享有遐福豈非濡染之既習
耶蓋公之得於天者五而修於已者六以言乎修於已
者一曰孝公少孤克自勤勵克自蓄聚蚤夜備養無方
以康我大母二曰悌躬劬家務二十年佐我岫雲叔父
俾無累私顧卒成進士肇開吾宗之昌大三曰慈洽比
其隣婚姻孔云難必赴患必卹求必應某老矣尚猶被

猶子之愛手書數至諄諄如面命四曰良貌不違心言
不匿意意不伏私見人之善揚之見人之不善抑之五
曰貞不以勢張不以利疚六曰簡不求不營笑語終日
恬焉如在無懷氏之世以言乎得於天者及我叔母徐
孺人偕老且康穰穰怡愉咸食遐福一也四子二壻賢
且有文其將光昭前人之令德二也婚嫁早畢身心燕
逸游處惟適三也承恩詔被冠服寵封將及四也濯纓
于川釀酒于泉黍稷盈阡子姓滿前以樂我長年五也
然則箕疇之所陳也華封之所祝也公不啻備膺焉將
不謂盛福矣乎然而非幸得也福非幸得人斯勸焉故

壽公所以勸俗也夫孝則根植悌則幹固慈則惠溥良則人悅貞則日尊簡則日休物之軌也根植則茂幹固則蕃惠溥則懷人悅則親日尊則榮日休則康理之致也是故公之備福賦之自天召之自我孰謂天道遠者盍亦於我公徵之

薛姑夫南明先生暨姑氏偕壽七十序

君子保真履素不胥弊弊焉駢枝於多事不惟壽康其身而又克昌厥後蓋驗之今昔而皆同也言養生者多術而其要不過日無勞爾形無搖爾精無使爾思慮營營云爾夫惟保真則欲寡履素則事簡故不期於無勞

形也而自無所於勞不期於無搖精也而自無所於搖
不期於無思慮營營也而自無所於營營焉若之何其
不康且壽也心安而氣和人修而天應集慶於闔閭而
發祥於孫子亢宗興閭戚於是乎在薛鄆之舊宗吾姑
夫南明先生簡質性成言不浮其行也貌不違其心也
無強合無苟求好惡以道而忮忌不萌夙明經學屢試
不遇而不以怨也脫膺

恩詔冠服在躬而不自以爲華也日惟左右圖史恬焉
泊焉休休焉爾矣吾姑氏明睿而莊飾巽靜而貞固曰
嬪以來踰五十年德協志孚未始有間言焉今者壽備

七十而聰明精健不渝少壯謂非寡思省事之所致歟
且學弗究用則其才有餘也養弗崇侈則其祿有餘也
故吾外弟二人曰大經曰大綸者忠信恭勤讀書修行
於歷世清白之風詩禮之習率履不越而先生諸孫又
森然秀發嫡孫其仁已克肆力經史年未迨冠而操觚
屬文頃刻數千言不窮其將振祖父之澤而大薛氏之
宗無惑焉先生與吾姑氏並綏繁祉又寧有旣也哉予
少則承獎教及濫科名常爲之喜溢恒品竊祿四十年
愧未有以報也辛丑之秋大經來京省吾母予因留之
家塾俾課諸幼大經念庭闈不置繪椿萱並茂圖將持

歸爲壽而予適有留都之

命乃得與之偕行四月十有三日吾姑生旦爰具殮率醴幣登堂拜祝而書其說於圖之上方以爲壽觴侑焉

、 叔母俞氏孺人六十壽序

嘉靖甲申之歲吾叔母俞氏孺人壽六十正月廿有七日初度邦奇繫官西蜀未獲奉觴拜嘉慶先期謹爲文而將之曰吾叔父岫雲先生起家進士令萍鄉三年居而士頌之去而民懷之沒而史書之宣譽於四方而享祠於後世吾叔母之相之也吾弟邦直邦亨沉厚而靜壹肆力於群經百家操觚發藻思沛焉有餘將自致其

身於

清朝光昭先人之令德吾叔母之成之也夫恭畏周詩以相勤也敦裕慈惠以相仁也篤素不華以相庶也是故弗祿日康矣夫孝友忠誠以成性也勤勵弗渝嚴恪有則以成學也是故榮昌有望矣且夫吾心有所獨安而人情有所同願安而靡悔願而必獲福也中閭之道始則從夫焉終則從子焉婦道毋儀不可以易而備也故心不能以皆安淑人哲嗣不可以力而致也故願不能以皆獲若吾叔母可不謂安且獲焉者耶且吾先世以詩禮相沿數十百年畜而弗售而肇發於吾叔父然

復歛厥猷爲不盡施焉以遺吾二仲而之又森然異矣上弘累世之澤而下垂慶於無疆可謂安之至而獲之多耶安之至獲之多者福之盛也福貴盛盛貴遠壽也者遠其福者也若叔母之德潛愈盛而遠無惑焉邦奇不肖愧無以仰酬誨育敢頌德美助歡燕於世恩之堂

外父松浦王公八旬初度序

進稀齡十年而耄古所稱上壽者也稀益甚矣壽先諸福而得所甚稀至福也然古者祝嘏必曰日戩穀必曰百順若不專於壽者何也夫人生欲壽亦謂有所饗之云

爾不欤窘窮拂戾徒焉領形苦心支歲月歷寒炎將焉
取於壽哉我外父松浦王公行年八十而履峻若夷視
遠若邇舉重若虛身則康矣布粟有儲瓜芋有區有山
有泉有田有廬家則給矣錫山飛翠樾浦凝碧禽蟲之
吟嘒礫瀨之潺湲棹空明憇修蔭率其性真樂其素履
訾議不能及凌侮不能加束帶衣錦詠歌

昇平心則休矣有子二人幹蠱且文諸孫秀發將嗣昭
前人之攸訓澤則綿矣備是數者以歷修齡庸不謂之
戩穀謂之百順矣乎王予鄞舊族而尚禮讀書予先君
子吏部公束髮與公友故予甫四齡而辱公以元女字

燕二十而委禽自是備承顧愛莫可殫述惟予先室淑人年不滿德食不酬勤予心每私惻焉然今叨竊祿位子女遶膝亦孰非淑人氏德意所及而我公餘庇安可誣也迺七月廿有六日屆公初度遠念邦族姻鄙咸且登堂奉觥而某繫官京師莫展哀悰敬緘非幣使群季代進卮酒而侑以茲文然公履耄彌智來筭未涯自是而耄而期願而衍於無窮則親族之所咸願而非獨予一人之私也雖相望千里尚亦同聲而祝也乎

南山李公七旬壽序

丹徒少尹致仕南山李公以明年壽七十前期元子濬

竣業太學以還將及其宗姻稱觴致祝焉時予方繫官未克言歸季弟邦禮公子婿也亦方游太學因及吾弟婦侍吾母于京師用是吾兄弟弗克從諸親後奉觴於情不能自釋乃及濬之行也而爲文寓歸頌以祝曰公之所以致遐福也有五位未充其德一也愷悌二也功浮於食三也恬退四也敦本睦族五也何謂位不充德公績學善文有志大用而屢試弗售竟以丹徒丞歸田人固謂弗展厥蘊矣何謂愷悌避其所趨遜其所競置其所猜捨其所取忘其所然不忘其所德休休焉默默焉杜門掃軌若將無所涉於世何謂功浮於食予昔道

丹徒公時爲丞旣數年庶勤如一日浚河渠便漕舟寬
征徭辨疑獄丹徒之士若民無弗愛且畏者而儉素自
持翛然如寒士何謂恬退政績旣聞旌獎於觀風者屢
人方顯擢是期而慨然自歎以爲善射之不如善息也
亟求致仕比得請以歸則快焉謂克全其璧何謂敦本
睦族斥其私蓄營家廟建綽楔表先太守公之名秩宗
族親故貧者捐俸分田贍卹之老無嗣者寡無依者極
意養給尤厚其終事夫位不克德則餘慶叢其身愷悌
則人懷而神佑功浮於食則民之祝嘏者衆恬退則名
完而無愧忤心泰神怡氣日充而精日固敦本睦族則

如竹之有苞也如松栢之有根也日滋長蕃茂而不可
拔公具是五者宜乎其福之備且遐也予別公旣七年
每聞其步履輕健書來心畫整整足徵所養之固平生
愛菊慕陶翁之爲人而清風完節卒與之偕其號南山
取採菊詩義也有子若文深賢且有文將弘厥施焉以
成公之志則公之樂爲何如而壽亦豈易量哉菊月十
有二日實維初度凡我親友登公之堂尚爲三復南山
之篇

封君盧公偕壽承恩序

嘉靖丙申夏五月潛雲盧子汝立以禮科給事中承

勅覈儲干荆粵維時專人封太常博士梅軒公壽八十
有二母封孺人應氏視公又二年以長給事得便道省
覲與其諸兄醕爵爲歡行有日踵門請予文予昔官太
學識汝立諸生中其氣貌溫醇充蔚而文亦如之及予
官吏部汝立以太常選擢禮科德譽日躋而位日益起
矣始公有子五人並事畊讀未始爲進士業也一夕夢
其所居之門有或顏之曰壬辰進士而汝立適生乃始
業進士果以壬辰登第若符券焉夫翁養怙食舊無希
榮干祿之心而崇德累善膺祐於天天乃錫之乎命以
啓其清崇華耀於今日豈偶然之故哉夫福不可以意

微而天不可以幸得無意於徼福而福日隆無心於得天而天日祐若公與孺人者其亦有爲乎孟子曰父母俱存兄弟無故一樂也夫謂之俱存非必殊壽也謂之無故非必多且賢也汝立兄弟六人協德懋義而父母並躋上壽筋力堅完

龍章鼎鍊將落有錫焉而汝立廼今官禁近承皇華晝錦之輝煥爛桑梓之鄉於以樂孺其兄弟而洽歡於庭闈人生福履之盛若此者海內其幾矣福之所集者德也天之所助者順也是故歆其福者頌其德訟諸人者推之天所以明天心而爲世勸也予旣雅知汝立側聞

公平生孝敬勤恪克和好其鄉閭曰孺人夙夜不懈以相成厥德所以感天之深招福之備固昭昭乎不可誣也故於汝立行也而爲之序以將之凡我鄉邦之士亦將有勸於斯文

慎齋徐翁七十榮壽序

海寧徐侍御仁甫將奉其母王孺人以歸疏上旣得請念其尊人慎齋翁以明年壽七十鄉戚將稱賀其堂乃豫謀於予請序之侍御予禮部所取士予用是知翁爲之序曰吾浙之諸川其最巨者曰太湖其地下而有容衆流歸之會萃旣多漸涵幾二百里然且渟浸瀦蓄致

極淵弘而後澤覃於東南利興於吳會軍國之需生民之麗皆資之翁湖人也將湖實鍾靈以生之邪何其德之似也翁孝友而質直不苟言笑人有咨詢告之必盡其忠時俗相徵遂揆諸義而後應讀書履善以禮經鳴庠校有年蓋可以有爲於世矣而五舉弗售鬱湮磅礴又二十餘年而以授諸其子是故積深而發其發也昌畜厚而流其流也博侍御君溫醇而雅飭明敏而謙冲承汪濊之澤而沛之乎壅遏之餘將不在茲乎翁年及古稀耳目聰明而精力完固遐筭未旣而

寵榮鼎來侍御方且將母以覲父孝慈下上歡動里閭

身繡斑斕輝映湖山之間天之資翁於昔乃所以豐於
今晦滯於一時固將以光亨于無艾也抑尚有進於是
者昔張孟侯仕漢其父年八十餘每遇遷陟輒一至京
師以視其子至則公卿置酒上壽盡歡乃罷當時旣以
爲榮而史氏傳之以爲盛事翁畢燕之日亦尚速其子
還朝或親携以行或歲時來視俾侍御無內顧憂而得
以悉力於王事挈具區而霖雨天下不亦慈孝之大也
乎而其爲湖山之光重何如也且予雖老尚能從公卿
後奉觴雖陋且劣石渠金策尚能執筆爲翁紀之

張少尹東川翁七十壽序

予昔弱冠仕京師東川張翁時游太學以博聞深造有聲貴游間予辱在親末居相比朝夕相往來甚狎也翁率直履素口無飾言心無伏機詡詡笑語洞見底裏見之使人愛之處久而不厭旣其別也亦使人不能忘于懷翁以少尹告歸于今旣十年壽且及古稀而予亦老矣每聞翁啓履康勝從容觴詠于東川之上則時欲解組相從而媿猶未之能也乃今六月廿有五日屆翁初度其子光祿君元祥以係官京師弗克稱觴承歡先期使幣戒行而謁文於予將以宣坐雲之情爲壽觴侑焉予乃言曰君無以未及歸省遽風戚爲也而翁有遐壽

之道三承歡之日不尙有待乎哉夫以翁富貴弗售僅
獲佐永豐政而數載之間勵精奮志抑奸逐良攝篆五
邑所至留愛徵焉澤下究而譽上騰乃以考最陞長沙
不少縻係而毅然引去蓋進以揚其才而退以明其節
曾或錙銖疚於其中耶夫自不疚則氣充氣充則壽一
也天性樂易不以偵測煩其慮不以譎變役其智不以
險忮營其情夫是以心泰而神定神定則壽二也席先
世之遺業負郭而襟江夏屋如雲膏壤如鱗陸海之饒
湖山之勝揮斥有餘資而游衍有餘地厥配李孺人並
怡高壽子姓之賢孝僕御之敏給皆足以康適其體膚

而娛暢其志意體康意暢則精氣強精強則壽二也具
是三者由稀齡而進而耄而耄而期其以展君之孝思
不尚多日也哉君其慎脩思永懋勞於清時名秩日躋
寵封將及顧不足以華重湖山而爲庭帟歡耶曾是不
務而規規於膝下之戀何爲者哉元祥聞予言乃爲之
釋然而喜遂序而書諸軸俾家老奉以行

封孺人林氏六旬榮壽序

嘉靖己亥春二月 封孺人林氏六旬初度前期其子
大理寺副照誥予門言日照也不肖實賴母氏誨育之
恩以幸有今日維是朝夕修滌之奉煥寒之需弗克終

親粵有歲時途路脩阻迎養未由烏鳥之私耿不自抑
明年壽躋六十初旦將臨照既未克言歸弟奕又齒貴
游於南雍宗閨姻媿方且集慶庭幃之前而爲之子者
弗及持一觴承顏色其曷以伸吾情哉惟先生惠昇一
言將寓歸爲親榮焉予嘗觀於天下國家之隆替閨闔焉
基大易家人之繇不過利女貞二言而周室之興本之
嬪京之德蓋培祉發祥遠者肇乎邇也外者原於內也
詩不云釐爾女士從以孫子夫家必有女士而孫子從
焉則家人自女貞之外又焉所藉以爲利乎此文王親
見厥家著之書而爲百世法也錢吾四明舊族翁以

忠信敦讓推重鄉邦聞天啟釐之女士如孺人者佐厥
義方以成其子大理君績學舉進士歷仕十年灼有休
問厥弟卒業胄監器藝足稱錢氏之門日以昌熾古人
有云一歲樹穀十歲樹木百歲樹德子姓之賢人情之
所至願而不可以歲月覲也是故樹德久矣子姓賢矣
其身或弗能待光顯也弗克見見矣或弗能久皆憾也
孺人年方及耆被封建章順鼎鍊臻華綬祉邈乎未涯下
無不待之歎而上有未艾之休其何樂如之求之古人
名寵如班大家豐榮如馬季倫可謂盛矣然或虧願於
偕老或頽宗於叔世孺人及翁並壽且康二子皆賢諸

孫又森然玉立乎庭著之間焉所謂獨冥其全者非耶
非至厚德何以臻此此不足以勵閭閻而裨陰教矣乎
大理君望雲之心懇懇詞色亦何必規規焉膝下之承
而所以爲受大樹遠地者固於是乎在此皆鄉邦盛事
不可以不書而又予情之所樂道焉者也因序以授君
俾家老奉以行

封君河涯李公偕壽圖序

善攝生者長生善養性者彌性孰能之寡思損欲者能
之夫攝生者非有加乎其生也能勿戕而已矣養性者
非有易乎其性也能無所損而已矣人之生也有涯而

情欲也無涯以有涯逐無涯其勢必殆嗇諸其無涯者
豐諸其有涯者長生彌性之術舍是將惡乎務哉封刑
科給事中河涯李公行年七十有五康強如少壯太史
平岡陳子東野郭子公鄉友也與予同史局故予獲聞
公詳焉盖公瀟洒而樂易興致清逸不嗜飲酒日哦古
詩自娛愛讀柳子郭橐駝傳悟其所謂天全而性得者
陶內真解外膠膏腴沙瘡笑談勦旨甘疏非清流茂
陰之間日與二三父老彈碁啜茗詡詡終日不知世之
有通塞是非榮辱也故其心油然而得其氣浩然而充
若之何其弗康且壽也其於種樹也亦然順而封植之

時而灌溉之弗撓弗耗根幹是植而藩液行焉是故茂
碩芬芳與他植者不類其於濟人也亦然脉理既得虛
之實之下之上之散之歛之迎而取之隨而順之而無
所役吾意是故爲醫者滿天下而公所全活獨多蓋公
之術可以康濟天下乃不見售而以授諸其子則吾見
東岡都諫之善承其家訓也抗言乎

殿陛之上而歡暢乎閭閻之下駸駸進用將使海內蒼
生咸若其性以全其天公之志不於是大慰也乎而益
康眉壽於無疆又奚俟問而知耶公偕楊氏孺人俱以
高齡沐

恩封怡祿養有子六人孫十有二人福履之備世不多
見迺三月 日屆公初度都諫以弗與綵觴繪圖成帙
介陳郭二太史請文於予以寓歸爲壽夫慈莫大乎迪
德孝莫大乎象賢樂莫大乎天性之真攝生養性莫大
乎樂其心而不違其志於以壽公舉天下之珍孰加焉
夫固人情所樂道也

壽慕泉陳翁七十序

夫水之源於山也渟濡而沕穆潛伏而盤紆其始也不
測其來也不禦其出也詰屈軼適蕩激奔汨而後浩乎
沛然放四海而止焉德之在人也亦然方其潛修嘿索

湮淪而未彰也屈壘而未揚也歷一再傳數十百年然後乃克大震耀於時斯豈易哉陳無錫之舊宗也惺泉生敬毅端介爲儒林宗舉進士歷官戶部郎中將顯乃弗克永年竟齋志以沒冢嗣慕泉翁溫良慈恕和不流正而不激古之賢哲之與游時之縉紳之與偕華靡遵矩矱思親教子睦族宜家秩秩如也蓋行年十而惺泉之風不少渝其平生可不謂賢孝矣乎翁義字子宜者克承庭訓舉于鄉卒業於太學予爲祭酒時謂其文行兼者也而心識之今年春弗偶于禮闈一試則惺惺焉若不能爲情以謂親年日高而不得沾

一命華庭帟曷以爲歡乃謁文於予將持歸爲壽觴值
予觀惺泉之施未竟也而慕泉翁又衍裕而滋培之數
十年于此矣譬則泉之淳畜紆迴於澗溪巖壑之間屢
逞而不得肆以作其欲怒之勢者久矣漚爲江河而弘
放奔溢其勢所必至也順巽審固如子宜者豈非陳氏
之澤蘊崇日久而將大施焉者乎翁之德何患其弗行
而子宜何必以一日之弗遇遽自戚戚爲也積彌昌而
導彌長亦在我而已矣遂書以勉子宜因以爲翁壽云

楊母李氏孺人壽序

海於天地間爲物最鉅而東海又百川所宗故世俗祝

壽必以東海言之謂其兼包總括極深廣而無窮焉爾
海之外洲島以數十計遠者爲東南夷僻絕不足凝天
地之秀而舟山在幅幘之內密邇蛟門實始受百川處
也氣之所鍾於是爲厚嶄然獨起於海波之中異方之
人罕至故其俗內貞而外質有古之遺風其人多壽多
富多備福焉孺人今揮使李侯姑也子曰千兵楊侯洪
揮使以才畧蒙任便備夷海上有聲譽而洪克協贊
其事孺人以莊凝之質貞素之德旣見其子姪呈能而
奮武駿駿見擢用而次子曰治曰濟又皆讀書力學將
效績于時年濟五旬體康而心泰優游蔗境而需寵命

于

天朝豈亦鍾氣之特厚將食福于無窮者耶十一月二十八日屈厥初度其子姓將奉觴爲壽而姻黨從之徐君德清者於楊於予皆戚也又歲遊舟山知楊門爲詳故爲之請文於予予不佞承諸君意輒本所生以福如東海祝焉詩曰

海波溔浩萃衆川兮彼美淑人百福駢兮又日泛彼舟山海中央兮爰載百寶用集于良兮

易菴鮑君偕詩序

夫婦之貴於偕壽也以永德也德之欲其永也以昌世

也先民有言十歲種之以樹百歲種之以德夫樹不歷
歲雖有梧櫟弗臻于用而况於德乎禮曰夫妻胖合傳
曰男女正天地之大義也夫婦相資而成德猶天地相
資而成化也外不足以倡則綱不舉故詩曰刑于寡妻
至于兄弟內不足以和則紀不備故詩曰乃及王季維
德之行蓋媿德固難媿德而偕壽尤難也鮑氏予鄞碩
宗裕軒公爲汀州太守益昌厥世易菴君其冢似也配
俞同邑內翰公之女石坦夷恭遜務義忘利而俞孺人
以純孝莊嚴之德成之內外之言未嘗踰闕而交愛之
誠彌久弗替故方裕軒公之仕于外也恆資崇禮以承

其志及其謝政而家食也恭承色養以娛其心至於隆
師厚友以成其弟之業也問匱鄙貧以睦其鄉閭宗姓
也隨所處而無愧色焉故其子之績學于家者效能于
官者卒業于胄監者皆循循雅飭言行不虧而致用有
望雖其義方所及而孝友睦婣之德交資而互積慶澤
深而英華發不可誣也今年壽偕六十精神齒髮不踰
少壯所謂永德而昌世將不在茲乎將不在茲乎君生
以十月廿有五日而誦人之生則先君旬有一日也稱
觴上壽雖婣族之私抑鄉邦咸以爲宜云

壽蒼崖吳公六十序

周禮醫師以五味五穀五藥養萬民之疾古之用藥也
必味與穀先焉而其於疾也不曰攻而曰養蓋擇利而
導相機而施畏而不敢輕也寧舍而不敢強也夫是以
無敗事今也不然靈蘭之事弗之寃也聲色之異竅藏
之變弗之省也悍焉挾其五毒之劑而以人命試幸而
中曰我之力也不中已亦無所與其憂焉此今之士所
以踵爲而莫之忌也而孰知天之不可欺乎昔者陽慶
善醫家富不屑治病乃卒以亡嗣夫術畜而弗施猶且
不可而况以無術戕斯人乎蒼崖吳翁之言曰醫吾聞
已病不聞病病聞利人不聞利於是故視喘息聽聲

音審清濁觀浮沉滑濇輕而揚之重而損之衰而彰之
實而宣泄之虛而掣引之按之收之熨而宜之優游以
俟之弗術能弗矜奇是故病去而人不知焉吳姬江舊
族先朝嘗以世義旌其門積善好施代有聞人而蒼崖
翁尤推重吳越間予昔見少叅西溪周公西江裴公亟
稱其賢因獲交於翁資其術餘十年矣翁溫柔坦易與
之處久而不厭今壽且六十精強如昔予三人皆克世
其業人以爲惠濟之報焉七月廿五日屆翁初度予妹
婿裘君景文及諸嘗德翁者將稱壽其堂而予方請告
家居念翁之德未嘗一日或釋于懷也於景文之行不

能不三致意焉

朴菴楊翁偕壽序

我聞在昔風氣淳樸吁哈之俗罔識機智暨于文武成
康文盛斯極越厥後人猶盱曰野矧惟尚質尚忠之世
矧惟赫胥大庭蕪居藪飲之時且夫雕朴起敝漓醇肇
衰胚渾之化弗始于朴其曷能布濩流行于無窮肆予
觀于今之人弗祇慎厥德弗敦大厥心逞厥愾謂簡
爲拙謂敬爲迂謂王公可欺謂天下莫已若智力旣屈
思保其妻孥弗可得非天阨民惟民自戕于厥初肆予
觀于朴菴楊翁若素弗續若器弗觚乃惟姻隣是洽惟

引三ノ系三本多クニフ
稼穡是力勗厥子孫惟詩書賢達是崇是依配曰胡孺
人亦惟翁言是聽夙夜劬勞用殷裕于厥家惟楊宗望
于慈谿翁及從弟柳塘方伯相勗以德義以彌昌厥家
然翁早失怙恃外氏焉依尺土隻楹罔攸藉于前人迨
于今茲夏屋如雲膏壤如鱗焉君子曰本實既敦柯葉
乃繁乃嘉靖乙酉翁及孺人偕躋老傳既富既臧既壽
且康子曰梧曰桐曰柱咸迪厥訓日熾而昌凡厥親交
乃以醴幣殮牽躋堂上壽僉曰惟是多祉匪以幸獲聞
之文詞尚亦以警俗勵世子聞曰可乃授茲文

賀裕菴董君壽圖序

福貴於備且久三百篇多祝嘏之詩間所稱日升月恒
山壽川增以及岡陵松柏之屬皆取喻於福之備且久
耳而後之以圖祝者實因之他如別傳所記王母蟠桃
之事鸞鳳芝蘭之比亦詩之釐以女士令妻壽母子孫
千億之祝莫非人情所同欲也缺嘗求之貲笄如陶朱
而啓釁於驕奢門族如袁閔而媿心於豪縱伉儷如馬
倫而祚胤弗昌壽考如林類如縈啓期而單寒不免則
夫福備且久如詩人所祝蓋自昔所難而况於今乎董
氏四明碩宗裕菴君祖先伯仲陟華騰聲蔚爲時望而
君於其間倜儻而周詳精敏而端重勤綜理以肥其家

敦恩義以諧其族義冠束帶以榮其身光拓先緒以昌
其業卹孤周急親賢尚士以大其施厥配錢孺人淑慎
勤勵相勸厥休非所謂令妻女士者乎今壽偕六十色
揚而氣充體豐而神固遐筭未可量焉非所謂如山之
壽如松栢之承者乎子孫之多至十有八人名庠校者
擢鄉闈者絃誦家孰之間者爭相振奮斬然見頭角耿
光大烈將日躋而未艾也非所謂如日之升如川之增
者乎於是姻黨游舊宣義薛先生輩謂君與孺人福備
而久溢箕陳浮華祝古今所難不可無賀乃雜取古詩
所祝列傳所記萃諸繪畫以致頌禱之意及君初度升

崇堂而獻焉蓋君之致盛也有由而交慶共祝以歌勸夫人之心亦勗善勵俗之一助云

賀封工部王事呂公六十壽序

人之所愛者莫如其身亦莫如其子愛身欲其貴愛子欲其才天下之同情也羣居數人或軒焉而慍或輕焉而喜矣使或霑

天子之寵命巍然立乎齊民之上其爲可願孰加焉然終其身艷慕於人而曾不得尺寸進焉者皆是也見其子能佔俾持鉛槧出而與儒生相偶語則怡然以爲慶矣使或英明秀偉學充而行修力宣於

邦家譽騰於縉紳而澤覃乎民庶其爲可願孰加焉然
終其身困於冥蒙欲少砭焉而卒莫之施者皆是也凡
若此者命也命也者莫之致而至故君子有獨膺申命
之休以盡適其所願而爲千億人之所政歎者亦恒以
不致致之彼其於穆之表常無心而獨運而人詎容以
私意非望所求乎哉封承德郎工部王事友菊呂公明
達而勤勵善擴其資業而不肯厚藏稍餘則以與宗戚
之貧弗振者與人交揆諸已而施之人或莫予揆順而
受之教其子從野使之隆師親友以翊資之故予友五
山陳子者王其塾數年而予因得以知公父子之賢焉

從野在卯角予輒以遠大相期于時特見其文以爲固
異後十餘年見其人溫而醇遜而則敏睿而周祥夫以
聲實旁流承

明天子之褒錫賁及庭幃而伸其孝愛之志此固從野
之才而厚蘊深培以駿發乎今日者實公之爲之也公
平生活於世味歲惟藝菊數百本日與能詩二三子觴
詠其間以陶其情而無或他慕及乎

恩詔及門適屆六旬之壽而神氣完凝步履輕健

寵榮之鼎來未艾而公且將坐食康樂於無窮此固天
下之同願而不可一日冀焉者而公能以不致致之天

之無心而妙於有心又於是乎益信予旣夙知公父子
又茲謬膺敷教之寄於凡天道休咎之徵

皇上福極之用皆得闡而揚之而備福如公非偶然者
可書也故特序以壽公而因以爲天下勸焉

、 壽李臣川先生序

予始與濟之李臣川先生舉進士年皆未滿三十而今
髮且俱艾矣臣川歷仕于內臺于荆于吳于浙于南粵
于貴陽當言無諱忌當行無低回敵愾禦侮則謀勇畢
發批虛剽劇則智勇旁行所至聲績著聞予不能企而
及及其公務稍暇寓情文詞不費追琢而旨趣充溢雖

專工之家或袖手不敢出一語予嘗與之泛舟漢沔乘風破浪數十里歷歷道古今慨然視天下事如不足爲已而予退居東大洋上臣川來官其土每訪予甯川之廬酒酣扁舟共載更唱迭和于槎潭石磯之間盡歡乃別未幾臣川位望日益起方期其大用忽一日謝事歸懷寧而予復謫官南雍雖相見未由而相去甚邇又其子承恩來游吾門故音問時接今四月二日臣川誕辰先期承恩請予文致頌禱意予因序而壽之曰夫位不必崇要諸立用不必竟要於才人不必其皆我合要於知已乎無愧且夫野馬也浮埃也生物之以息相吹也

其吹我而榮邪而悴邪消邪息邪吾不得而爲也非惟
吾不得而爲人亦莫吾如何也吾安其遇以養其和夫
是之謂善應善應不窮康且裕抑斯言也恒情疑達士
信若吾臣川者聞之能不欣然舉觥

慶藩相俞公八旬榮壽序

人生以壽爲難壽而榮又難也卽有貴於其身至六十
七十有不在落寞之鄉者乎其時也則惟後人焉是賴
而後人之貴且顯又不可以訾幸得壽之不得以兼榮
勢也封建之世其祖先有功德於斯人焉而子孫席之
以世其富貴理也自官不世授而貴者顯者率崛起白

屋之中夫崛起者必其聰明秀偉者也挾負之富文詞之美不同於流輩足以頽然而出者也夫人孰不以是願於子孫而竟莫之致天也而非人也萬有一焉得之於天必其心之厚乎仁者也公平不欺者也先乎人後乎其身者也予淵之建德俞公明經弗第貢于

廷分教下平陰九年遷伊府紀善又九年遷審理正尋以子貴遂致仕以歸蓋公子五人廩邑庠者二舉進士者二今爲僉憲爲侍御器藝功業皆闡焉未涯理家政者一而孫曾之爲鸞爲鵠且森然庭除之下矣夫八旬上壽也子多且才才且顯鼎餽交承而封誥將累錫焉

大榮也公平生仁信端良尚義好施所以事天者既至而天之福之若是焉盛固宜也十月朔吉維公生日侍御君將以公事便道歸省鄉後進之游太學者交來請予文予獲交待御君知公啓履康強優游以躋上壽君之歸也適當初度之期而慕德之士不問疎戚不遠千里咸致其慶祝之私焉人也而亦天也予則惡能已於言也

慶守菴王翁偕壽序

昔周武王訪道於箕子建極錫福而壽爲之先三百篇所稱萬壽千歲云者不一而足夫欲壽固人之情而祝

壽固古之俗也以其序祝祝必以初度則古所未有予用是雅不喜爲壽序然自解官侍養越五載間而壽序已數十作則皆有說焉嘉靖癸未夏五月予奉

命將視學于梁州王君天祥爲其友人王秉卿以壽序請蓋守菴王翁以明年甲申五月十有八日爲七旬初度厥配陳則二月二十有二日也秉卿其長子以予將遠役故豫以爲言予辭不暇則天祥道其謬知之情而爲之三致意焉予惟

國家用文武之道歛福錫民百六十年于茲德澤深而風氣淳宜斯人膺筭之長也若守菴翁敦善履素自處

恬愉與物無競而陳孺人以勤儉孝敬相而成之上以
安其親而下以淑其子內以嚴于家而外以睦于鄉非
所謂錫

上保極之民乎其偕老益康固其宜也且孔子論舉文
武之政在修身事親而推本於知人今稱秉卿之賢者
吾友天祥也則秉卿之知人不既素矣乎其相與講求
規勸厚彝倫而篤爲政之本者宜何如也他日出而效
用憲章先王用弼亮我

國家推所以壽康其親者而敷錫天下以益光慈孝之
心焉翁與孺人所欲孰大於此夫欲遂則情適情適則

和則壽益固理也宗姻集慶之日尚以是申言

默菴顧公皆壽序

人之所願莫如長生而備福然已固願之而人弗願焉
亦不足以爲榮爲其徒食於已而無與於人也夫苟生
而益於世則其身之所食人亦與焉若之何其弗願
之封工科給事中崑陽默菴顧公年躋八十其配王孀
人七十有七而耳目齒髮皆不渝其舊其於生也可謂
長矣公之子貴並膺

封典幹蠱裕家純有貽燕諸孫又皆秀而有文克繩厥

武其於福也可謂備矣吾嘗咨之公之立身也讀書尚
義恬然無外嗜其處家也養若姜詩順若江革以得親
之歡惠若卜式忍若公藝以寡怨於兄弟其處鄉黨也
强者憚其嚴弱者懷其德訟非直者質其成其事其邦
之大夫也忠信而不渝服勤而不懈恪慎之德久而益
著焉凡公之作內作外孺人又克相而成之蓋生世有
補而致福之不偶也如此可不謂榮乎今夫樗櫟之承
年蠅蠅之多積佞幸之寵澤張湯之有後皆不足以掩
其惡人則厭而惡之如其有德矣不幸而貧若榮公短
若顏子無後若楊雄仇匪其人若馮衍人情亦不免戚

嗟焉惟夫備德於躬而長有多福足以爲斯世勸如公
與孺人者人之歆艷而祝願之也非其情之不能已哉
南京刑部主事沈君於公厚姻也乃及其生旦以其子
姓宗戚鄉閭之情謁予以言予非能言者然於公也足
以徵天道而暢人情亦其言之不容已也夫

張文定公紆王樓集卷之九